

# Rapport da gestiun 2020 dil president dalla pleiv catolica romana s. Martin, Trun

Preziau sur Tomasz  
Preziadas parochianas, prezai parochians

En miu rapport sco president dalla baselgia catolica romana s. Martin da nossa vischnaunca dundel a vus las necessarias informaziuns sur dil passau en nies cumin-baselgia duront igl onn d'uffeci vargau.

## 1. General

Egl onn vargau ha ei dau mo in tema per nus tuts, e quei ei stau la pandemia Covid-19. Tut nossas activitads ein stadas pertuccadas dallas mesiras ch'ei vegnidas dadas avon dalla regenza. Pervia da quellas mesiras eis ei stau naven da miez mars digl onn vargau per in liung temps scumandau da far survetschs divins cun participaziun da personas. Pli tard han ins lu puspei astgau celebrar ils survetschs divins cun mo paucas parochianas/parochians. Tier sepulturas ni era tier las grondas fiastas sco Nadal, Pastgas, Dumengi' alva ni Creisma eis ei stau grev d'acceptar quei. Era per ils funcziunaris eis ei stau fetg pretensius d'adina puspei setschentar en sin ina nova situaziun. Lein sperar che la situaziun s'enormalisescha plaunsiu e nus savein puspei far nos survetschs divins cun baselgias pleinas.

### a) Suprastonza

La collaboraziun denter la suprastonza ha funcziunau per mia cumpleina cuntentientscha. Nus havein structurau ils process da lavur aschia ch'ei ha constau da miu manegiar per mintga suprastont. El temps dalla pandemia ei il basegn da vegnir informaus staus immens gronds, quei pensum ha per gronda part nies plevon Sur Tomasz Piotr Drwal ensemen cun nossa actura Olivia Pfister surpriu. Per in liung temps han mo 50 personas astgau prender part dil survetsch divin. Per tener en quellas prescripziuns ha pil pli, leu nua ch'ei ha fatg da basens, in commember dalla suprastonza fatg las controllas necessarias. En tut priu eis ei vegniu acceptau detg bein quellas prescripziuns. En 4 sedutas ei la suprastonza seradunada ed ha liquidau ils pensums adossai ad ella. Pensums delegai ad in ni l'auter per liquidaziun (art. 24 dalla constituziun) ha il responsabel sligiau e sch'igl ei stau necessari ha la suprastonza s'ancziunau quella decisiun. La collaboraziun cun il cussegl pastoral cun sia iniziativa presidenta Isabel Defuns-Gamboni ha funcziunau grondius.

### b) La pastoraziun

Grazia agl engaschi da nies zun preziau plevon sur Tomasz Piotr, mo era cun igl agid da tut ils auters gremis dallas pleivs e caplania en special la gronda lavur dil secretariat, dil cussegl pastoral e dalla catecheta ha la pastoraziun funcziunau era en quei tut special onn per cumpleina cuntentientscha.

### c) Instrucziun religiusa

*Per igl onn da scola 2020/2021 havein nus giu il cletg danflar il catechet Stefan Bolli per las scolas superiuras. Cun Stefan Bolli vein nus anflau in fetg capavel catechet che ha giu fatg il seminari da scolast, dau entgins onns scola e lu sescolaus vinavon sco catechet.*

### d) Veta e mort

Mintgin ha siu agen pensum cheu sin tiara e quel entscheiva cun la naschientscha e finescha cul viadi en la perpetnada. Veta e mort stattan datier in da l'auter. Duront il davos onn havein nus stuiu prender cumiau da caras conchristianas e conchristians, denton havein nus era saviu selegrar ensemen cun ils geniturs da novs battegiai.

Davos la statistica stattan muments grevs mo era uras legrevilas.

Battens	9 a Trun e 0 a Schlans
Premcommunicants	6 affons
Nozzas	1 a Trun e 0 a Schlans
Extrada ord la baselgia	3 a Trun e 0 a Schlans
Mortoris	13 a Trun e 1 a Schlans

A tuttas defunctas e defuncts engraziel per il bien che nus havein astgau retscheiver dad els. Allas familias en malencurada esprimin nus nossa pli sincera condolientscha.

## 2. Engaschis en la pleiv

*Enteifer la communitad cristiana sin territori da nossa vischnaunca havein nus ina liunga roscha da fideivlas collaboraturas e collaboraturs e quei duront pli liung temps ora. Nus havein in zun activ cussegl pastoral, fideivels e cunscenzius ugaus capluttas ed ina massa autras persunas che fan el zuppau ina gronda lavur ch'ins vesa in summa buca. Menziunar lessel era il cussegl pastoral, sco era la lavur dallas calustras e calusters, dils ugaus capluttas e dils organists era lessel punctuar la lavur da biars che vegn prestada voluntariamein duront igl onn ora.*

*Allas persunas engaschadas lessel far in compliment per tut lur engaschi per il beinstar da nossa baselgia: Lecturas, catechetas e catechets, l'organisaziun entuorn mintga sepultura, ils organists, ils chors, ils dirigents dils chors, l'uniun da mummas e dunnas, l'uniun da giuventegna cun ornar l' entrada alla baselgia cun tschuppi e fluras, la musica instrumentala per embellir las fiastas e secapescha era tuttas persunas ch'orneschan e schubregian las baselgias.*

Tgi conta ussa d'ina sepultura?

En special lessel menziunar igl engaschi da dunna **Rilana Cadruvi Scherrer**. Ensemen cun siu um **Clau Scherrer** e nossa catecheta **Isabelle Defuns** organischeschan els adina puspei tier specialas occasiuns nua ch'ils affons stattan dil survetsch divin specialas messas cun cant d' affons. Igl onn vargau ha **Rilana Cadruvi Scherrer** ensemen cun **Letizia Scherrer** e **Judit Scherrer** cantau dalla messa da Nadal ed han aschia procurau cun quei bellezza cant in tec normalitad en quei temps special. Era all'uniun da mummas e dunnas ergraziel per tut lur engaschi. Igl onn vargau ha ei buca dau occurenzas aber jeu sai che nus savein aschi spert sco la situaziun senormalisescha, puspei quintar cun lur agid. Era a nossas ugaus e nos ugaus caplutta s'auda ei in special engraziament, preparan els mintgmai las capluttas per il survetsch divin e han quitau dalla facultad da mintga caplutta. Cun quei che nus havein per la caplutta Nossadunna dalla neiv a Schlans negin ugau, procura dunna **Renata Pfister-Maissen** voluntariamein igl usitau quitau dalla caplutta.

Buca emblidar d'engraziar lessel per las activitats entuorn las processions e sepulturas, A **Giusep ed Isabelle Defuns** per il riug da sepultura, allas **giuvnas** per il purtar la Nossadunna mintgamai da perdanonza sco era tut quels che **portan ils cafanuns** tier mintga fiasta. Alla **suprastonza communal** saudi in cordial engraziament per purtar mintga fiasta ecclesiastica il balduchin. Aschia vegnan fiastas embellidas e la veta da cuminonza viva.

A gl'entir **cussegl pastoral**, cun l'engaschada presidenta **Isabelle Defuns**, actuara e las menadras ditgel in sincer engraziel fetg per lur bien sustegn da nies plevon. Nus havein in cussegl pastoral che sengascha cun tutta premura per il beinstar da nossa cuminonza.

## 3. Petgas da nossa cardientscha

### a) Ductrina

Ella scola da Trun vegn dau ductrina en tuttas classas e cheutras tschentau in bien fundament religius per ils affons. L'instrucziun religiusa ei vegnida dada: emprema tochen quarta classa dalla premurada catecheta **Isabelle Defuns-Gamboni**. Ella sengascha era fetg cun ils affons per ils survetschs divins per famiglias. La 5. e 6. classa vegn instruida da **Hubert Venzin** che prepara medemamein l'instrucziun dalla s. Creisma. Il scalem ault vegn instruius sco gia menziunau da **Stefan M. Bolli**.

### b) Fatgs da Baselgia

Tuts ils fatgs da baselgia vegnan avon el rapport dalla presidenta dil cussegl pastoral.

### c) Manteniment dils beins

Per gl'usitau manteniment dils baghetgs sacrals sco era tier las casas pervendas vegn igl administratur a dar plaid e fatg.



#### 4. Persunal

##### a) Lecturas e parter ora la s. communiun

Allas lecturas: **Annamaria Cavigelli-Tschuor**, **Gabi Cajacob-Mirer**, **Isabelle Defuns-Gamboni**, **Esther Tomaschett-Monn** e **Manuela Wolf-Tomaschett** per Trun, **Marta Bundi-Giger**, **Josefa Wolf-Tomaschett**, **Anita Orlik-Vincenz** per Zignau engraziell cordialmein per lur buns survetschs ch'ellas fan dumengia per dumengia.

##### b) Organists

Antras la pandemia havein nus era bu astgau cantar en baselgia aschia che la musica dall' orgla ei stada en quei temps aunc bia pli impurtanta per nus. Perquei lessel engraziar zun fetg a nos organists **Clau Scherrer** e **Jacinta Jacomet-Lombriser**.

Ei ha dau dumengias nua che nus havein giu negin accumpignament cun l'orgla. Per quella situaziun supplichein nus vus da haver capientscha.

Tier sepulturas ha Marcel Pöhl da Rabius segidau ora in per gadas. Igl ei tuttavia bu sempel d'anflar mintgamai in organist per sepulturas.

A **Claudio Vincenz** engraziein nus cordialmein per la prontadad d'embellir dumengia per dumengia las s. messas cun musica sacrala en la baselgia da Zignau. Mo era als organists dil chor cecilian **Gieri Maissen**, **Clau Scherrer**, **Flurin Monn** e **Flavio Bundi** schein in sincer "Dieus paghi".

##### b) CalustrAs

Special engraziament admittel allas calustras ed als calusters: **Gabi Cajacob-Mirer** per la baselgia parochiala, **Letizia Rensch-Tomaschett** per la baselgia da Zignau, **Georgina Flepp-Cahannes** per la baselgia da Schlans sco era **Tarcisi Guldemann** per Nossadonna dalla Glisch. Era lessel engraziar a **Georg Cajacob** per sia prontadad da segidar en cass specials. Senza lur gronda lavur el zuppau funcziunas nies sistem buca. Ei vegn prestau bia e buna lavur nunvesevla, mo pauc da lur lavur vegn enconuschenta allas parochianas e parochians.

#### 5. Renconuschientscha ed engraziament

Tgei fuss ina cuminonza senza la lavur da biars funcziunariAs. Quella cuminonza essas vus che separticipais alla veta religiosa en nossa pleiv e caplania cun assister allas s. messas ni d'autras purschidas. Persuenter lessel admetter il duiv engraziament, sperond che nossa cuminonza resti activa era el temps da desinteress per la religiun, sco era per nossa baselgia catolica romana. Nies zun premurau plevon, sur Tomasz vegn sustenius digl engaschau cussegl pastoral e l'iniziativa catecheta Isabelle Defuns-Gamboni che fa cun lur team in bien fundament, sin il qual nus savein baghegiar si nossas activitads cristianas.

In sincer e profund engraziament ei il minimum ch'jeu sai admetter a mes consuprastonts sco era alla revisura **Lea Alig-Flury** ed al revisur **Gion Friberg**.

Enten il rapport hai menziunau plirs engraziaments. Jeu sperel ch'jeu hai emblidau negin, sche quei fuss il cass, lessel sperstgisar tier quellas persunas ed engraziar en quei mument era a lez.

Sco finziun lessel engraziar a vus, preziasas parochianas e parochians, che segideis adina puspei sin ina u l'autra moda morala ni finanziaria per il beinstar da nossa pleiv ni documenteis, entras vossa preschientscha, dumengia per dumengia vies interess per ils fatgs da nossa religiun.

Sco cuminonza sa la veta da pleiv mo exister cun il sustegn da bia mauns e sur da quels disponin nus aunc il mument. Per tut quei agid e sustegn seigi engraziav da tut cor.

Trun, matg 2020

*Pieder Decurtins, president*